



An Scéim Cónaitheachta d'Ealaíontóirí Damhsa 2025/2026

Treoirínite d'Iarratasóirí

Spriocdháta: 5.30pm (am na hÉireann), Déardaoin 20 Feabhra 2025

Iarratasóirí faoi mhíchumas

Déanann an Chomhairle Ealaíon gach iarracht freastal réasúnta a dhéanamh ar dhaoine faoi mhíchumas chun úsáid a bhaint as ár seirbhísí.

Má tá tú faoi mhíchumas agus má theastaíonn cúnamh uait le d'iarratas a chur isteach, déan teagmháil linn a luaithe is féidir roimh an spriocam.

Teagmhálaí: An tOifigeach Rochtana do Dhaoine faoi Mhíchumas

Guthán: 01 618 0200 nó 01 618 0243

Ríomhphost: access@artscouncil.ie

CLÁR

Pointí tábhachtacha nach mór cuimhneamh orthu	3
Cabhair a fháil maidir le d'iarratas	4
1. Faisnéis faoin Scéim Cónaitheachta d'Ealaíontóirí Damhsa	5
1.1 Cuspóirí agus tosaíochtaí na scéime	5
1.2 Cé atá i dteideal iarratas a dhéanamh?	6
1.3 Cé hé an t-iarratasóir?	7
1.4 Cé nach bhfuil i dteideal iarratas a dhéanamh?	7
1.5 Cad ar ar féidir leat iarratas a dhéanamh?	7
1.6 Cad nach féidir leat iarratas a dhéanamh air?	11
1.7 Cén t-ábhar tacaíochta nach mór duit a chur isteach le d'iarratas?	11
1.8 Incháilitheacht	13
2. An dóigh le d'iarratas a dhéanamh	15
2.1 Cláraigh le Seirbhísí ar Líne na Comhairle Ealaíon	15
2.2 Líon isteach an fhoirm iarratais	16
2.3 Ullmhaigh aon ábhar tacaíochta atá riachtanach don iarratas	16
2.4 Iarratas a dhéanamh ar líne	18
3. Próiseáil agus measúnú na n-iarratas	20
3.1 Forbhreathnú	20
3.2 An próiseas measúnaithe	20
3.3 Critéir chun iarratais a mheasúnú	20
3.4 Painéil phiaraí	21
3.5 Toradh na n-iarratas	22

Pointí tábhachtacha nach mór cuimhneamh orthu

- D'fhonn iarratas a dhéanamh, **ní mór** duit a bheith cláraithe le haghaidh cuntas Sheirbhísí Ar Líne na Comhairle Ealaíon (OLS). Mura bhfuil ceann agat, is féidir leat clárú le ceann a fháil [anseo](#). Tabhair faoi deara go bhféadfadh sé suas le **cúig lá oibre** a thógáil sular féidir úsáideoir nua a chlárú ar OLS, mar sin tabhair go leor ama duit féin é seo a dhéanamh sula mbeidh an spriocdháta buailte leat.
- Molaimid go láidir duit an cháipéis seo a léamh go cúramach sula dtosaíonn tú ar an bpróiseas chun d'iarratas a dhéanamh.
- Molaimid go láidir duit freisin tosú ar an bpróiseas go luath agus **go leor ama** a fhágáil chun d'iarratas a dhéanamh.
- Molaimid go mbeadh sé mar aidhm agat d'iarratas a uaslódáil **daichead a hocht uair an chloig ar a laghad** roimh an spriocdháta fógartha. Ar an gcaoi sin, bheadh am agat dul i dteagmháil linn má bhíonn aon fhadhbanna teicniúla agat agus bheimis in ann cuidiú leat.
- Tabhair faoi deara, de bharr an lín mhóir iarrthóirí a úsáideann an córas ar líne lá an spriocdháta, nach féidir linn a dheimhniú go mbeimid in ann aon fhadhbanna teicniúla a bheadh agat a réiteach, sa chás go dtéann tú i dteagmháil linn **i ndiaidh a 2.00 p.m. lá an spriocdháta**.
- Léigh an seicliosta seo a leanas go cúramach:

-
- Tá na treoirlíne seo léite agam agus tuigim iad.
 - Sa chás go raibh fadhb agam, chuaigh mé i dteagmháil leis an gComhairle Ealaíon chun cúnaimh a fháil, i bhfad roimh an spriocdháta.
 - Tá gach cuid den fhoirm iarratais a bhaineann le m'iarratas comhlánaithe agam.
 - Tá gach ábhar tacaíochta atá riachtanach ullmhaithe agam, mar a shonraítear sna treoirlínte seo, agus tá siad sin réidh le huaslódáil agam.
 - D'iarr mé ar dhuine éigin eile m'iarratas a sheiceáil chun a chinntiú nach bhfuil aon earráidí ann agus nach bhfuil aon rud ar iarraidh.
-

Cabhair a fháil maidir le d'iarratas

Má tá ceisteanna agat faoi shuíomh gréasáin na Seirbhísí ar Líne a úsáid, tabhair cuairt ar rannán na gCeisteanna Coitianta ar ár suíomh gréasáin: <http://www.artscouncil.ie/ga/Teigh-i-dteagmhail-linn/FAQS/Seirbhisi-ar-line/Seirbhisi-ar-line/>

Má tá ceist theicniúil agat faoin bpróiseas iarratais ar líne agus nach bhfuil freagra ar do cheist i rannán na gCeisteanna Coitianta, is féidir leat ríomhphost a sheoladh chuig onlineservices@artscouncil.ie, nó glaoch ar an gComhairle Ealaíon ar **01 618 0200/01 618 0243**

Má bhíonn ceist agat faoi d'iarratas nach mbaineann le cúrsaí teicniúla, ba cheart duit teagmháil a dhéanamh leis an bhfoireann ealaíon a bhfuil iarratas ar mhaoiniú á chur faoina bráid agat ar ríomhphost nó ar an bhfón. <http://www.artscouncil.ie/ga/Teigh-i-dteagmhail-linn/Liostai-den-bhfoireann-agus-de-chomhairleoiri/>

Chun féachaint ar ár dtreoir YouTube maidir le hiarratas a dhéanamh, téigh chuig <https://www.youtube.com/artscouncildemos>

1. Faisnéis faoin Scéim Cónaitheachta d'Ealaíontóirí Damhsa

1.1 Cuspóirí agus tosaíochtaí na scéime

Is é is cuspóir don Scéim Cónaitheachta d'Ealaíontóirí Damhsa seo ná cobhsú a dhéanamh ar líonra ealaíontóirí damhsa cónaitheacha ar fud na tíre agus tacú leo. Tá an scéim dírithe go sonrach ar ealaíontóirí damhsa ag obair i gcomhpháirt le hionad ealaíon, le heagraíocht ealaíon nó le féile agus/nó le húdarás áitiúil (NB: tá údarás áitiúil éigeantach do Shnáithe 1). Baineann dhá shnáithe leis an scéim seo.

Snáithe 1: Cónaitheachtaí iomlána

Tá sé mar aidhm ag an scéim seo:

- Cleachtas damhsa gairmiúil agus damhsa sa phobal a chobhsú i gcomhthéacsanna éagsúla
- Deiseanna a sholáthar d'ealaíontóirí damhsa ar fud na tíre páirt a ghlacadh i gclár oibre ealaíonta a bheidh ábhartha ó thaobh a gcleachtais féin
- Deiseanna a sholáthar d'údarás áitiúla, d'ionaid ealaíon, d'eagraíochtaí ealaíon agus d'fhéilte ealaíon cleachtas damhsa a fhorbairt ina gceantair féin i gcomhoibriú leis an iarratasóir
- Forbairt pleanála fadtéarmaí agus inbhuanaitheacht gníomhaíochtaí neamhspleácha damhsa a spreagadh.

Snáithe 2: Cónaitheachtaí gearrthéarmacha

Tá sé mar aidhm ag an scéim seo:

- Tacaíocht a thabhairt do chónaitheachtaí gearrthéarmacha le hionad ealaíon nó le heagraíocht nó le féile
- Deis a thairiscint chun comhar a bhunú agus an áit damhsa a fhorbairt le spriocghrúpa daoine
- Cleachtas damhsa gairmiúil agus pobail a chobhsú i gcomhthéacsanna réigiúnacha éagsúla
- Deis a sholáthar do chohóirt nua daoine le rochtain a fháil ar dhamhsa ardchaighdeán.
- Deis a bheith ann do mheantóireacht le healaíontóirí damhsa cónaithe bunaithe.

Tabharfar tosaíocht do thograí a bheidh bunaithe ar:

- A ábhartha is atá cuntas teiste/taithí an damhsóra d'ábhar na cónaitheachta
- Soiléire na ngníomhaíochtaí atá beartaithe mar chuid de chlár comhleanúnach ealaíne
- Cáilíocht na rannpháirtíochta le pobail áitiúla
- A oiriúnaí is atá na hacmhainní ealaíne agus riaracháin don chónaitheacht damhsa
- Leibhéal dearfach na rannpháirtíochta agus na tacaíochta cómhartaí atá idir na páirtithe go léir a bhfuil baint acu leis an gcónaitheacht.

Snáithe 1: **Ní mór** tacaíocht thiomanta i scríbhinn ó údarás áitiúil amháin agus ó ionad ealaíon nó ó eagraíocht ealaíon nó ó fhéile ealaíon amháin ar a laghad a bheith in éineacht le tograí maoinithe le haghaidh Snáithe 1.

Snáithe 2: **Ní mór** tacaíocht thiomanta i scríbhinn ó ionad ealaíon nó ó eagraíocht ealaíon nó ó fhéile ealaíon a bheith in éineacht le tograí maoinithe le haghaidh Snáithe 2.

Cuireann straitéis deich mbliana na Comhairle Ealaíon (2016–25), *Saothar Ealaíne Iontach a Tháirgeadh: Forbairt na nEalaíon in Éirinn a Threorú* an bonn eolais faoi na dámhachtainí uile (féach anseo: <http://www.artscouncil.ie/ga/straitéis-na-comhairle-ealaion/>).

1.2 Cé atá i dteideal iarratas a dhéanamh?

Tá an Scéim Chónaitheachta d'Ealaíontóirí Damhsa oscailte dóibh seo a leanas, duine díobh nach mór ról an phríomhiarratasóra a ghlacadh faoin scéim:

Snáithe 1

- Ealaíontóirí damhsa gairmiúla a bhfuil cónaí orthu i bPoblacht na hÉireann agus a bhfuil tacaíocht thiomanta acu ó údarás áitiúil amháin agus ó ionad ealaíon nó ó eagraíocht ealaíon nó ó fhéile ealaíon amháin ar a laghad
- Údaráis áitiúla a bhfuil sé beartaithe acu cónaitheacht a bhunú d'ealaíontóirí damhsa gairmiúla.

Snáithe 2

- Ealaíontóirí damhsa gairmiúla a bhfuil tacaíocht thiomanta acu ó ionad ealaíon, ó eagraíocht ealaíon nó ó fhéile.
- Ealaíontóirí damhsa ar mian leo tabhairt faoi thréimhse meantóireachta le healaíontóir damhsa cónaitheach oilte chun a gcleachtas pobail a fhorbairt
- Damhsóirí ar mian leo cónaitheacht ghearrthéarmach a fhorbairt le cohórt sonrath daoine.

Bíonn cásanna eisceachtúla ann nuair a ghlacann an Chomhairle Ealaíon le hiarratais incháilithe ó dhaoine nach cónaitheoirí de chuid Phoblacht na hÉireann iad. Sula n-admhóidh an Chomhairle Ealaíon go bhfuil iarratas den sórt sin incháilithe, áfach, bheadh ar an gComhairle a bheith sásta go gcuirfeadh torthaí togra den sórt sin leis na healaíona i bPoblacht na hÉireann.

Mar chuid dá [Beartas Comhionannais, Éagsúlachta agus Ionchuimsitheachta](#), tá an Chomhairle Ealaíon tiomanta do **chomhionannas rochtana, deiseanna agus torthaí** a chur ar fáil do gach iarratasóir féideartha beag beann ar:

- Inscne
- Claonadh gnéis
- Stádas sibhialta nó teaghlaigh
- Reiligiún
- Aois
- Míchumas
- Cine
- Ballraíocht den Lucht Siúil
- Cúlra socheacnamaíoch.

Sa scéim maoinithe seo, cuireann an Chomhairle Ealaíon fáilte ar leith roimh iarratais ó gach cuid de shochaí na hÉireann, lena n-áirítear aon cheann de na tréithe a luaitear thuas ach gan a bheith teoranta dóibh sin amháin agus/nó tionscnaimh a chuireann deiseanna nó torthaí cothroma ar fáil dóibh siúd atá bainteach leo.

1.3 Cé hé an t-iarratasóir?

Is ionann an t-iarratasóir agus an duine nó an eagraíocht a gheobhaidh aon deontas a thairgfear agus a bheidh freagrach as glacadh le téarmaí agus le coinníollacha an deontais sin.

Ní íocfar aon deontas a thairgfear ach isteach i gcuntas bainc atá á shealbhú in ainm an iarratasóra.

Níor mhór go mbeadh na cáipéisí go léir a chuirfear ar fáil in ainm an iarratasóra (ealaíontóir damhsa aonair, údarás áitiúil nó ionad ealaíon) – e.g. má dhéanann tú iarratas chuig an gComhairle Ealaíon ar mhaoiniú faoin ainm Máire de Barra, níor mhór go mbeadh gach cáipéis, lena n-áirítear sonraí bainc agus sonraí cánach, san ainm sin. Ní ghlacfar le leaganacha malartacha amhail Mary Barry nó Barry Studios.

1.4 Cé nach bhfuil i dteideal iarratas a dhéanamh?

Áirítear leo seo a leanas na daoine nach bhfuil i dteideal iarratas a dhéanamh:

- **Snáithe 1:** ealaíontóirí damhsa nach bhfuil tacaíocht thiomanta acu ó údarás áitiúil amháin agus ó ionad ealaíon nó ó eagraíocht ealaíon nó ó fhéile ealaíon amháin ar a laghad, nó ó mheitheal d'ionaid ealaíon agus d'údaráis áitiúla
- Damhsóirí atá fostaithe go lánaimseartha ag eagraíochtaí atá ag fáil Maoiniú Straitéiseach.
- **Snáithe 2:** ealaíontóirí damhsa nach bhfuil tacaíocht thiomanta acu ó ionad ealaíon, ó eagraíocht ealaíon, nó ó fhéile ealaíon amháin ar a laghad
- Damhsóirí atá fostaithe go lánaimseartha ag eagraíochtaí atá ag fáil Maoiniú Straitéiseach.
- Ionaid ealaíon, eagraíochtaí ealaíon agus féilte ealaíon a fhaigheann maoiniú ón gComhairle Ealaíon. Mar sin féin, ba cheart go mbeadh comhpháirtíocht le heagraíocht amháin dá leithéid i gceist. Is gá do na heagraíochtaí sin a dheimhniú go bhfuil na gníomhaíochtaí dá dtabharfar tacaíocht éagsúil agus neamhspleách ar ghníomhaíochtaí atá maoinithe cheana.
- Eagraíochtaí a bhfuil maoiniú á lorg acu le tacú le hoiliúint ghairme/fochéime nó iarchéime.

1.5 Cad ar ar féidir leat iarratas a dhéanamh?

Is é an t-uasmhéid a dhámhtar as gach iarratas rathúil:

Snáithe 1:

Suas le €25,000

Snáithe 2:

Suas le €10,000

Ní féidir leat iarratas ar thacaíocht a dhéanamh ach faoi shnáithe **amháin** den dámhachtain. Ní mór duit an snáithe ar a bhfuil iarratas á dhéanamh agat a aithint go soiléir i gcuid 1.4 den fhoirm iarratais.

Glacfaidh an duine nó an eagraíocht a aithnítear mar an príomhiarratasóir freagracht fhoirmián as bainistiú na gcistí don chlár.

Ní mór ábhair shonracha an chláir oibre a bhfuil maoiniú á lorg lena aghaidh a aontú i gcomhar leis an ealaíontóir damhsa, leis an údarás áitiúil (Snáithe 1 amháin) agus leis an ionad ealaíon nó leis an eagraíocht ealaíon nó leis an bhféile ealaíon. Le haghaidh Snáithe 1 agus Snáithe 2, ag brath ar riachtanais an cheantair, d'fhéadfadh clár oibre do Scéim Chónaitheachta d'Ealaíontóirí Damhsa cuid de na gníomhaíochtaí seo a leanas a chuimsiú:

- Saothar nua cóiréagrafaíochta a chruthú le linn tréimhse taighde agus forbartha
- Léiriúcháin a chur ar siúl in ionaid ealaíon áitiúla
- Comhoibriú le healaíontóirí damhsa áitiúla nó le healaíontóirí áitiúla a shaothraíonn meáin eile
- Imeachtaí clársceidealaithe ar nós siompóisiamáí, aoi-chónaitheachtaí nó cláir dhamhsa
- Comhoibriú le healaíontóirí damhsa eile i gcónaitheachtaí ar fud na tíre
- Ceardlanna agus ranganna damhsa áitiúla a threorú
- Oibriú i scoileanna áitiúla chun tuiscint phraiticiúil ar dhamhsa agus díospóireacht acadúil faoi dhamhsa a chothú
- Oibriú le grúpaí damhsa don óige
- Oibriú mar mheantóir le healaíontóirí, le lucht féachana agus le grúpaí eitneacha mionlaigh agus le grúpaí míchumais
- Cabhrú le hionaid ealaíon áitiúla, eagraíochtaí ealaíon nó féilte ealaíon chun cláir ghairmiúla damhsa a chur chun cinn
- Comhairle a chur ar stiúrthóirí na n-ionad ealaíon áitiúil, na n-eagraíochtaí ealaíon nó na bhféilte ealaíon faoi chlársceidealú damhsa ghairmiúil.

Tabhair faoi deara nach mbaineann an scéim seo ach le gníomhaíochtaí a bheidh ar siúl sa tréimhse 2025/2026 cé go bhféadfaidh an chónaitheacht a bheith ar siúl ar feadh roinnt blianta.

Cé mhéad maoinithe ar féidir leat iarratas a dhéanamh air?

Ní mór buiséad mionsonraithe ina leagtar amach an t-ioncam agus caiteachas ar fad a bhaineann leis an gcónaitheacht bheartaithe a chur isteach le hiarratais faoin Scéim Chónaitheachta d'Ealaíontóirí Damhsa. Is ionann an t-uasmhéid maoinithe is féidir leat a iarraidh agus an difríocht idir an **caiteachas iomlán** agus an **t-ioncam iomlán** a shonraíonn tú i do bhuiséad mionsonraithe.

- Ba chóir go mbeadh na costais a bhaineann le luach saothair* an ealaíontóra damhsa agus costais ar bith a bhaineann leis an gcónaitheacht san áireamh sa **caiteachas iomlán** – e.g. na costais uile a bhaineann le cur chun cinn agus poiblíocht, costais riaracháin, etc.
- Ba chóir an t-ioncam uile a bhaineann leis an gcónaitheacht damhsa a bheith san áireamh san **ioncam iomlán**, an méid airgid a bhfuil tú ag súil lena fháil ó mhaoinitheoirí eile, ó chomhpháirtithe léiriúcháin, ó fháltais, ó dhíol clár, ó urraíocht tráchtála, ó thiomsú airgid, etc. san áireamh.

Is tábhachtach freisin gach tacaíocht chomhchineáil** a léiriú san ioncam agus sa chaiteachas araon chun fíorluach agus luach iomlán do thogra a chur in iúl.

* Nóta maidir le pá ealaíontóirí

Tá an Chomhairle Ealaíon tiomanta do phá agus coinníollacha ealaíontóirí a fheabhsú. Sa chomhthéacs seo, tá [beartas](#) foilsithe ag an gComhairle Ealaíon maidir le luach saothair agus conraitheoireacht chóir chothrom ealaíontóirí. Áirítear anseo prionsabail an chleachtais is fearr ar cheart dóibh siúd ar fad a oibríonn sna healaíona a bheith ag dréim leo.

Caithfear gach ealaíontóir a bhíonn páirteach i ngníomhaíochtaí a mhaoiníonn an Chomhairle Ealaíon a íoc go cóir. Caithfidh aon duine a bhfuil maoiniú á lorg acu ón gComhairle Ealaíon insint dúinn cén chaoi a gcinnteoidh siad go bhfaighidh ealaíontóirí pá agus coinníollacha córa agus sonraí maidir leis sin a thabhairt ina mbuiséid. Úsáidfimid é sin mar chuid den phróiseas measúnaithe iarratais, agus ní thairgfimid aon mhaoiniú má mheasaimid go bhfuil an pá ró-íseal nó faoi chaighdeán an tionscail, nó nuair nach bhfuil téarmaí na fostaíochta iomchuí. Trínár meicníochtaí tuairiscithe, déanfaimid monatóireacht ar chomhlíonadh.

Ní leagaimid amach ná ní mholaimid rátaí pá ach aithnímid ról na n-eagraíochtaí sin a bhfuil sainordú acu sin a dhéanamh agus tagraímid dóibh sin i gcás gur ann dóibh. Tugaimid tiomantas freisin do thacú le príomheagraíochtaí ionadaíocha agus acmhainne chun athbhreithniú a dhéanamh ar rátaí tionscail agus chun uirlisí nua a fhorbairt a thacaíonn leis an bpróiseas conraitheoireachta.

**** Nóta i dtaobh tacaíocht chomhchineáil**

Má tá tú ag súil le tacaíocht chomhchineáil a fháil, is gá duit luach airgeadais a chur uirthi ionas go mbeidh an ranníocaíocht a dhéanann sí le fíorluach do thogra soiléir. Ba cheart duit caitheamh le tacaíocht chomhchineáil mar chaiteachas agus mar ioncam araon: pé méid a dhearbhaíonn tú ar thaobh an chaiteachais, ba cheart duit é a dhearbhu freisin ar thaobh an ioncaim.

Ní féidir am a thugann na stiúrthóirí nó comhaltaí boird a áireamh mar chostas comhchineáil.

Iarrtar ort an t-ioncam, an caiteachas agus an méid atá á iarraidh agat a shonrú ag trí chéim le linn d'iarratais:

- Ar líne, nuair a chuirfidh tú tús leis an iarratas (na figiúirí iomlána amháin)
- I gcuid 3 den fhoirm iarratais
- I do bhuiséad mionsonraithe.

Cinntigh go bhfuil na figiúirí iomlána mar an gcéanna sna trí chás, agus cinntigh gurb ionann an méid atá á iarraidh agus CAITEACHAS IOMLÁN lúide IONCAM IOMLÁN.

Costais rochtana d'ealaíontóirí nó rannpháirtithe¹ faoi mhíchumas

Tá an Chomhairle Ealaíon tiomanta dár gcláir mhaoinithe agus an obair a mhaoinímid a dhéanamh inrochtana do chách.

Tógann an Chomhairle Ealaíon an sainmhíniú ar mhíchumas ó Airteagal 1 de Choinbhinsiún na Náisiún Aontaithe ar Chearta Daoine faoi Mhíchumas, ina sonraítear:

‘Áirítear i measc daoine faoi mhíchumas na daoine sin ar a bhfuil mallachair fhadtéarmacha de chineál fisiciúil, meabhrach, intleachtúil nó céadfach ar mallachair iad, nuair a nasctar iad le nithe eile, a d'fhéadfadh a bheith ina gcúis le cosc ar pháirteachas iomlán éifeachtach sa tsochaí ar an mbonn céanna le daoine eile.’

Is féidir costais rochtana do dhaoine faoi mhíchumas a chur san áireamh laistigh de d'iarratas agus tá dhá chineál ann ar féidir leat iarratas a dhéanamh orthu.

¹ Tugann an Chomhairle Ealaíon sainmhíniú ar rannpháirtithe mar iad siúd a chuireann iad féin in iúl go cruthaitheach trí pháirt a ghlacadh i ngníomhaíochtaí ealaíonta.

1. Costais phearsanta do rannpháirtithe nó do dhaoine faoi mhíchumas

Ba cheart go mbainfeadh an tacaíocht seo bacainní d'ealaíontóirí nó do rannpháirtithe faoi mhíchumas a bhfuil do thogra á sheachadadh acu. Mar shampla:

- Tusa
- Na príomhealaíontóirí, daoine aonair, grúpaí nó eagraíochtaí a bhfuil baint acu le do thogra
- Comhpháirtithe nó comhoibrithe
- Foireann léiriúcháin
- Príomhfhoireann nó príomhphearsanra riaracháin.

D'fhéadfaí na cinn seo a leanas a áireamh le roinnt samplaí den tacaíocht:

- Ateangaire Theanga Chomharthaíochta na hÉireann do rannpháirtí nó do rannpháirtithe
- Seirbhísí oibrí tacaíochta rochtana
- Am breise cleachtaidh nó sa stiúideo.

Tabhair faoi deara: is féidir cur isteach ar na costais rochtana phearsanta do dhaoine agus do rannpháirtithe faoi mhíchumas anuas ar an uasmhéid atá ar fáil don dámhachtain.

2. Costais rochtana lucht féachana do dhaoine faoi mhíchumas

Is costais iad seo chun do chuid oibre a dhéanamh inrochtana do dhaoine faoi mhíchumas agus ba cheart iad a mheas mar ghnáthchuid de do chuid oibre. Táimid ag iarraidh a chinntiú go mbainfidh tuilleadh daoine sásamh as eispéiris ealaíon ar ardchaighdeán agus gur féidir le gach duine rochtain a fháil ar, agus sásamh a bhaint as an obair a mhaoinímid.

Sampla de chostais rochtana chun do chuid oibre a dhéanamh insroichte do lucht féachana is ea:

- Ateangaire TCÉ le haghaidh d'imeachta nó le haghaidh do thaibhithe
- Seirbhís tráchtareachta fuaimne a úsáid
- Do shuíomh gréasáin a chur in oiriúint do léitheoirí scáileáin
- Ábhair thaispeántais a chruthú i bhformáidí eile amhail Braille nó fuaim.

Tabhair faoi deara: ba cheart duit costais rochtana lucht féachana do dhaoine faoi mhíchumas a chur san áireamh sa tsuim iomlán a iarrann tú. Ní mór dóibh a bheith laistigh den uasmhéid atá ar fáil don dámhachtain.

Cad a tharlóidh má tá an maoiniú a thairgfear dom níos lú ná an méid a d'iarr mé?

Má thairgtear maoiniú duit atá níos lú ná an méid a d'iarr tú, pléifimid leat conas a bheartaíonn tú do ghníomhaíocht mholta a sheachadadh.

Conas iarratas a dhéanamh ar chostais rochtana do dhaoine faoi mhíchumas

Ní mór dúinn tuiscint a fháil ar an bhfáth a bhfuil tú ag cur isteach ar chostais rochtana do dhaoine faoi mhíchumas agus ar an gcaoi a gcomhlíonann siad riachtanais do rannpháirtithe nó do lucht féachana.

Má chuireann tú costais rochtana do dhaoine faoi mhíchumas san áireamh i do thogra, ní mór duit na costais a léiriú in dhá líne ar leithligh den fhoirm iarratais.

- Líne le haghaidh costais rochtana phearsanta do dhaoine nó do rannpháirtithe faoi mhíchumas agus sin amháin
- Líne le haghaidh costais rochtana phoiblí do dhaoine faoi mhíchumas agus sin amháin

Caithfear cáipéis a uaslódáil freisin ina liostaítear na costais sin i dteannta na n-ábhar tacaíochta. Tá teimpléad roghnach ar fáil ar leathanach maoinithe Cónaitheachta d'Ealaíontóirí Damhsa ar shuíomh gréasáin na Comhairle Ealaíon.

Tabhair faoi deara: is cuma má úsáideann tú teimpléad na Comhairle Ealaíon nó do cháipéis féin, ní mór an dá chineál costas rochtana do dhaoine faoi mhíchumas a thaispeáint ar leithligh.

Lena fháil amach faoin mbealach a ndéanann muid d'iarratas a mheas, féach ar chuid 3 de na treoirínte thíos.

1.6 Cad nach féidir leat iarratas a dhéanamh air?

I measc na ngníomhaíochtaí agus na gcostas nach féidir leat cur isteach orthu, tá siad seo a leanas:

- Mórcheannacháin chaipitiúla
- Príomhchostais Leanúnacha
- Gníomhaíochtaí nó costais nach n-oireann do chuspóir na scéime
- Gníomhaíochtaí a d'oirfeadh níos fearr do dhámhachtain eile arna maoiniú ag an gComhairle Ealaíon nó arna feidhmiú ag gníomhaireachtaí Stáit eile, amhail Cultúr Éireann
- Gníomhaíochtaí a bhí ar siúl cheana féin nó a gcuirfear tús leo sula ndéanfar cinneadh faoi d'iarratas
- Gníomhaíochtaí ag carthanais chlárarithe chun airgead a bhailiú d'eagraíochtaí eile
- Gníomhaíochtaí a bhfuil sé mar aidhm leo páirt a ghlacadh i gcomórtas
- Gníomhaíochtaí chun brabús a dhéanamh
- Gníomhaíochtaí a ndearna an Chomhairle Ealaíon measúnú orthu cheana féin, mura féidir leat a léiriú go ndearna tú an togra a fhorbairt óna chuir tú iarratas isteach an uair roimhe **nó** má mhol an Chomhairle Ealaíon duit go sonrath d'iarratas a atreorú chuig an dámhachtain seo. Cuimhnigh, áfach, nach ionann a leithéid de chomhairle agus léiriú go n-éireoidh leis an iarratas.

1.7 Cén t-ábhar tacaíochta nach mór duit a chur isteach le d'iarratas?

Ciallaíonn ábhar tacaíochta ábhar **ar leith ó** d'fhoirm iarratais agus **sa bhreis air**. Cabhraíonn sé seo leis an duine a bhfuil measúnú á dhéanamh aige ar d'iarratas chun tuiscint níos

An Scéim Chónaitheachta d'Ealaíontóirí Damhsa 2025/2026: Treoirínte d'Iarratasóirí

soiléire a fháil ar do thogra. Léigh go han-chúramach an liosta seo a leanas den ábhar tacaíochta a theastaíonn, mar is é an chúis is mó a meastar iarratais a bheith neamh-incháilithe ná go dteiptear cloí leis seo.

Le bheith incháilithe le haghaidh measúnú i gcomhair maoiniú faoin Scéim Cónaitheachta d'Ealaíontóirí Damhsa **caithfidh** tú an t-ábhar tacaíochta seo a leanas a chur isteach ar líne le d'fhoirm iarratais:

- Buiséad mionsonraithe ar leithligh ina leagtar amach an t-ioncam agus an caiteachas beartaithe don chónaitheacht bheartaithe (ní mór é sin a chur isteach chomh maith leis an bhfaisnéis bhuiséid atá san fhoirm iarratais).
- CV mionsonraithe cothrom chun dáta (trí leathanach ar a mhéad) den ealaíontóir damhsa cónaitheachta a bheartaítear
- Meabhrán tuisceana idir na comhpháirtithe uile atá i mbun an iarratais (i.e. an t-ealaíontóir, an t-ionad ealaíon agus an t-údarás áitiúil); ba cheart an méid seo a leanas a bheith san áireamh leis sin:
 - Breac-chuntas ar an gclár oibre/gníomhaíochtaí a dhéanfaidh an t-ealaíontóir damhsa i gcaitheamh na cónaitheachta
 - Liosta de na hacmhainní airgid, comhchineáil agus bonneagair a chuirfear ar fáil chun tacú leis an ealaíontóir damhsa
 - Miondealú soiléir ar ról agus ar fhreagrachtaí gach páirtí maidir leis an gcónaitheacht – ealaíontóir damhsa, údarás áitiúil agus ionad ealaíon
- Ba cheart duit tagairt a dhéanamh don seicliosta don iarratas ar an gcéad leathanach den cháipéis seo chun liosta a fháil de mhíreanna eile a d'fhéadfadh a bheith éigeantach maidir le d'iarratas.

Ábhar breise a bhíonn de dhíth i gcásanna áirithe

Má tá tú ag lorg costais rochtana bhreise phearsanta do dhaoine nó do rannpháirtithe faoi mhíchumas nó don lucht féachana faoi mhíchumas, cuir cáipéis san áireamh ina leagtar amach na costais sin, agus an chaoi ar thángthas orthu. Déan cinnte go gcuireann tú an méid breise san áireamh mar chuid de do bhuiséad.

Má tá obair le hainmhithe i gceist le do thogra, ní mór duit cóip de do *Bheartas agus Nósanna Imeachta um Chosaint Ainmhithe* a chur ar fáil.

D'iarratais a bhaineann le leanaí agus le daoine óga atá faoi bhun 18 mbliana d'aois

Éilíonn an Chomhairle Ealaíon ar gach duine aonair agus ar gach eagraíocht a sholáthraíonn seirbhísí (mar shampla seirbhísí cultúrtha, áineasa, oideachais) do leanaí agus do dhaoine óga atá faoi bhun ocht mbliana déag d'aois beartais agus nósanna imeachta oiriúnacha um chosaint leanaí a chur i bhfeidhm. Agus iarratas á dhéanamh agat, **caithfidh** tú a chur in iúl i gcuid 1 den fhoirm iarratais cé acu a bhaineann do thogra leis an aoisghrúpa seo nó nach mbaineann.

- Má fhreagraíonn tú 'Tá' ar an gceist seo san fhoirm iarratais agus má éiríonn le d'iarratas, beidh ort, mar choinníoll maoiniúcháin, a dheimhniú agus a léiriú go bhfuil beartais agus nósanna imeachta oiriúnacha um chosaint leanaí i bhfeidhm agat.
- Má éiríonn leat, iarrfar ort Féin-iniúchadh Dearbhaithe Cáilíochta na Comhairle Ealaíon i dtaca le Cosaint agus Leas Leanaí a chomhlánú ar <https://childprotection.artscouncil.ie/>. Téigh chuig www.tusla.ie le tuilleadh faisnéise a fháil maidir le Tús Áite do Leanaí.

- Éileofar ort freisin do chuid sonraí a nuashonrú sa táb faisnéise faoin bpróifíl sa chuntas Seirbhísí ar Líne (gabh chuig an rannán chun do chuntas a nuashonrú chun sin a dhéanamh).

Maidir le hiarratais a bhaineann le daoine fásta soghonta

Agus iarratas á dhéanamh agat, **caithfidh** tú a chur in iúl i gcuid 1 den fhoirm iarratais an bhfuil obair le nó le haghaidh daoine soghonta mar chuid de do thogra nó nach bhfuil. Má fhreagraíonn tú ‘Tá’ don cheist seo, cuireann tú in iúl go n-oibreoidh tú leis an gchórt seo nó go gcuirfidh tú obair i láthair don chórt seo mar chuid de do thogra agus go n-aithníonn tú go bhfuil tú ar an eolas maidir leis an *mBeartas agus na Nósanna Imeachta Náisiúnta um Chosaint Daoine Soghonta atá i mBaol Mí-úsáide** agus go gcloíonn tú leis (féach [anseo](#)).

Tabhair faoi deara le do thoil go bhféadfaí iarraidh ort níos mó fianaise maidir le comhlíonadh na mbeartas seo a chur ar fáil má éiríonn le d'iarratas.

Measfar nach bhfuil d'iarratas incháilithe mura gcuirfidh tú an t-ábhar tacaíochta riachtanach isteach.

An fhormáid le haghaidh ábhar tacaíochta

Ní mór gach ábhar tacaíochta don chlár maoinithe seo a chur isteach ar líne.

Cuir faisnéis chomhthéacsúil san áireamh le haghaidh gach ábhar tacaíochta i dtéacschomhad atá lipéadaithe go soiléir. Má chuireann tú comhaid físe isteach, cuimsigh, le do thoil, sonraí faoin saothar, cá huair a léiríodh agus cá háit ar léiríodh é, tráchttaireacht ar théama an tsaothair nó tráchttaireacht ghinearálta, ainm na dtaibheoirí, agus conas a maoiníodh an saothar (e.g. dámhachtain, féinmhaoiniú). Níor cheart na sleachta a bheith níos faide ná trí nóiméad agus níor cheart níos mó ná trí shliocht a chur isteach.

Má bhíonn faisnéis uait ar na formáidí comhaid a cheadaítear d'aon ábhar tacaíochta is mian leat a uaslódáil mar chuid den iarratas, féach ar chuid **2.3 Ullmhaigh aon ábhar tacaíochta is gá don iarratas**.

Tabhair faoi deara: is féidir úsáid a bhaint as naisc chuig ardáin sruthaithe le samplaí de shaothar a thabhairt. Ní mór ábhar tacaíochta neamhspleách amhail CVanna agus litreacha tacaíochta etc. a uaslódáil mar cháipéisí ar leith le d'iarratas.

1.8 Incháilitheacht

Measfar go bhfuil d'iarratas **neamh-incháilithe** agus ní chuirfear é chun cinn go dtí an chéad chéim eile den phróiseas má bhaineann aon cheann de na rudaí seo a leanas leis:

1. Chuir tú an t-iarratas isteach i ndiaidh an spríocdháta.
2. Níor chomhlánaigh tú gach cuid den fhoirm iarratais a bhaineann le do thogra.
3. Níl tú incháilithe iarratas a dhéanamh faoi na critéir a leagtar amach i gcuid 1.2 agus i gcuid 1.4 thuas.
4. Chuir tú iarratas isteach ar mhéid maoinithe atá níos mó ná an t-uasmhéid a cheadaítear don dámhachtain ar a bhfuil iarratas á dhéanamh agat, faoi mar atá leagtha amach i gcuid 1.5 thuas (ach amháin nuair atá tú ag déanamh iarratas ar mhéid breise chun costais rochtana a chlúdach).
5. Chuir tú iarratas isteach le haghaidh gníomhaíochta nó cuspóra nach féidir iarratas a dhéanamh ina leith faoi mar a leagtar amach i gcuid 1.6 thuas.

An Scéim Chónaitheachta d'Ealaíontóirí Damhsa 2025/2026: Treoirlínte d'Iarratasóirí

6. Níor chuir tú gach ceann de na hábhair thacaíochta riachtanacha mar a leagtar amach i gcuid 1.7 thuas ar fáil.
7. Tá d'iarratas níos oiriúnaí do chlár maoinithe eile a thairgeann an Chomhairle Ealaíon nó gníomhaireacht mhaoinithe eile (cuirfimid an deis maoinithe níos oiriúnaí in iúl duit sa chás seo).

Tabhair faoi deara: sa chás go meastar go bhfuil d'iarratas neamh-incháilithe, ní dhéanfar measúnú air agus beidh tú in ann iarratas a dhéanamh leis an togra céanna i mbabhtaí maoinithe sa todhchaí.

2. An dóigh le d'iarratas a dhéanamh

2.1 Cláraigh le Seirbhísí ar Líne na Comhairle Ealaíon

Ní mór gach iarratas a dhéanamh trí Sheirbhísí ar Líne na Comhairle Ealaíon; ní ghlacfar le hiarratais a dhéanfar ar bhealach ar bith eile (sa phost, ar facs nó ar ríomhphost).

Ní mór duit cuntas Seirbhísí ar Líne a bheith agat chun iarratas a dhéanamh. Mura bhfuil cuntas Seirbhísí ar Líne agat cheana féin, cláraigh tríd an bhfoirm chlárúcháin a chomhlánú anseo: <https://onlineservices.artscouncil.ie/register.aspx?&lang=gd-ge>.

Laistigh de chúig lá oibre, seolfar ARN (Uimhir Thagartha Ealaíontóra) uathúil agus pasfhocal chugat trí ríomhphost, agus beidh tú in ann úsáid a bhaint astu chun logáil isteach ar na Seirbhísí ar Líne.

Riachtanais maidir leis na Seirbhísí ar Líne a úsáid

Nóta: beidh ríomhaire/ríomhaire glúine de dhíth ort le húsáid chun d'iarratas a chur isteach. Ní oibríonn ár láithreán gréasáin Seirbhísí ar Líne ar fhóin ná ar tháibléid.

Ní mór do do ríomhaire agus don bhrabhsálaí idirlín na riachtanais seo a leanas a chomhlíonadh ionas go n-oibreoidh na Seirbhísí ar Líne duit:

-
- PC**
- Córas oibriúcháin Windows 7 nó leagan níos déanaí de Windows
 - Oibreoidh OLS leis na leaganacha is déanaí de gach brabhsálaí – e.g. Microsoft Edge, Google Chrome, Safari, Mozilla Firefox
-

- Mac**
- Mac OS X v10.5 Leopard nó leagan níos déanaí de chóras oibriúcháin Mac
 - Oibreoidh OLS leis na leaganacha is déanaí de gach brabhsálaí – e.g. Microsoft Edge, Google Chrome, Safari, Mozilla Firefox
-

Tabhair faoi deara: ní mór go mbeidh Microsoft Word (Deasc) nó OpenOffice Writer suiteáilte freisin chun an fhoirm iarratais féin a chomhlánú. Bogearra saor in aisce is ea OpenOffice Writer is féidir a íoslódáil anseo: <https://www.openoffice.org>.

Úsáideoirí OpenOffice

Féach ar ár bhfíseán *Using OpenOffice to download, complete and upload the application form* ag <https://www.youtube.com/watch?v=iT9Xxgmg0Eo>

Ní mór duit OpenOffice Writer leagan 4.0.1 nó níos luaithe a úsáid. Nuair a úsáidtear leaganacha níos déanaí ná 4.0.1 de OpenOffice Writer athraíonn an chaoi a bhfeictear ár bhfoirmeacha iarratais nuair a chuirtear isteach trí Sheirbhísí ar Líne iad.

Nótaí tábhachtacha d'úsáideoirí Apple Mac

- Tabhair faoi deara an chuid san fhíseán YouTube (ag 1 nóim. 20, tá an nasc ar fáil thuas) ina bpléitear leis an leagan 4.0.1 a íoslódáil ar ríomhairí Mac ar a mbeadh an córas oibriúcháin Mac OS Mojave nó leagan níos luaithe suiteáilte.
- Ní féidir OpenOffice 4.0.1 a íoslódáil ar Mac ar a bhfuil an córas oibriúcháin MAC OS Catalina. Má tá an córas oibriúcháin seo nó leagan níos déanaí de suiteáilte ar do Mac, beidh ort leagan 4.1.9 de OpenOffice, nó leagan níos nuaí de, a íoslódáil agus a úsáid.

Mura féidir leat aon cheann de na riachtanais sin a chomhlíonadh nó mura dtuigeann tú iad, téigh i dteagmháil linn le comhairle a fháil chomh luath agus is féidir leat roimh an spriocdháta.

Fág do dhóthain ama agat féin chun an t-iarratas a chomhlánú

Ba cheart duit eolas a chur ar shuíomh gréasáin na Seirbhísí ar Líne tamall maith roimh an spriocdháta agus roimh duit iarratas a ullmhú. Is dócha go mbeidh an-chuid cuairteoirí ar an suíomh tráthnóna an spriocdháta. Ba cheart duit d'iarratas a ullmhú agus a chur isteach tamall maith roimh an spriocdháta.

D'fhéadfadh an t-am uaslódála a bheith i bhfad níos faide ná an t-am íoslódála. D'fhéadfadh sé go dtógfadh sé níos faide ná mar a cheapfá d'ábhar tacaíochta a uaslódáil.

Tacaíocht theicniúil a fháil

Má bhíonn tacaíocht theicniúil uait agus iarratas ar líne á dhéanamh agat, is féidir leat dul i dteagmháil leis an gComhairle Ealaíon ach ríomhphost a sheoladh chuig onlineservices@artscouncil.ie nó trí ghlaoch a chur ar 01 6180200/01 6180243. Molaimid duit aon deacrachtaí teicniúla a thuairisciú dúinn tamall maith roimh an spriocdháta. Tabhair uimhir ghutháin agus déan cinnte go bhfuil tú ar fáil chun glaoch uainn a fhreagairt.

Déileáilimid le fiosruithe ar bhonn tús freastail ar an gceann is túisce.

Cuimhnigh go ndéantar anrud glaonna ag druidim leis an spriocdháta agus go mb'fhéidir nach réiteofar glaonna i dtaobh tacaíocht theicniúil a gheofar tar éis a 2.00 p.m. ar lá an spriocdháta.

2.2 Líon isteach an fhoirm iarratais

Mura bhfuil sé seo déanta agat cheana féin, íoslódáil an fhoirm iarratais don dámhachtain ar mian leat iarratas a dhéanamh uirthi. Is cáipéis Microsoft Word (Deisce)/OpenOffice Writer í an fhoirm iarratais, a chomhlánóidh tú as líne (ar do ríomhaire féin). Tugtar treoir ar an bhfoirm iarratais maidir le conas gach cuid den fhoirm a líonadh isteach.

Tabhair faoi deara: tá an fhoirm iarratais leagtha amach chun go mbeidh an Chomhairle Ealaíon in ann faisnéis a bhaint uathí chun críocha measúnaithe. Tá sé **thar a bheith tábhachtach** go mbeidh freagraí clóscríofa sna boscaí liatha ar an bhfoirm, agus nach mbainfear iad agus/nó nach mbeidh rud ar bith clóscríofa lasmuigh díobh. Má dhéanann tú é sin, beidh fadhbanna ann agus d'fhoirm á huaslódáil.

2.3 Ullmhaigh aon ábhar tacaíochta atá riachtanach don iarratas

Ní mór duit ábhar tacaíochta a chur isteach le d'iarratas. Mar shampla, d'fhéadfadh go mbeadh CV nó samplaí de shaothar reatha de do chuid i gceist leis seo – e.g. téacs, físeán, íomhánna nó taifeadtaí fuaime (féach ar chuid **1.7 Cén t-ábhar tacaíochta nach mór duit a chur isteach le d'iarratas?**).

Ní mór duit an t-ábhar tacaíochta uile den sórt sin a chur isteach ar líne – ba cheart duit, más gá, ábhar a scanadh nó a shábháil i bhformáid leictreonach.

Na formáidí comhaid a nglactar leo

Liostaítear sa tábla seo a leanas formáidí comhaid do d'ábhar tacaíochta.

Cineál comhaid	Iarmhír comhadainm
téacscomhaid	.rtf/.doc/.docx/.txt
comhaid íomhá	.jpg/.gif/.tiff/.png
comhaid fuaime	.wav/.mp3/.m4a
comhaid físe	.avi/.mov/.mp4
scarbhileoga	.xls/.xlsx
Comhaid PDF Adobe Acrobat	.pdf

Ar mhaithe le háisiúlacht, bailigh le chéile na comhaid go léir a theastóidh uait in áit inrochtana ar do ríomhaire.

Naisc URL a chur isteach

Tabhair faoi deara: is féidir úsáid a bhaint as naisc chuig ardáin sruthaithe le samplaí de shaothar a thabhairt. Ní mór ábhar tacaíochta neamhspleách amhail CVanna agus litreacha tacaíochta etc. a uaslódáil mar cháipéisí ar leith le d'iarratas.

In áit d'ábhar a uaslódáil go díreach, féadfaidh tú naisc a chur ar fáil chuig ábhar atá á óstáil ar ardáin sruthaithe nach gcuireann teorainn ar rochtain trí shíntiús airgeadais. Chun é sin a dhéanamh, cóipeáil an URL (seoladh iomlán an tsuímh ar a bhfuil d'ábhar á óstáil) isteach i gcáipéis Microsoft Word (Deisce) nó OpenOffice Writer nó cáipéis PDF agus uaslódáil é mar cháipéis tacaíochta ina bhfuil nasc gréasáin.

“Cé nach liosta iomlán é seo, ba shamplaí d'ardáin chomhroinnte inghlactha iad YouTube, Vimeo, SoundCloud, Bandcamp.

Tabhair faoi deara nach nglacfaimid le naisc chuig na foinsí seo a leanas:

- Suíomhanna comhroinnte comhad – e.g. Google Drive, OneDrive
- Ardáin na meán sóisialta – e.g. Meta, Instagram
- Do láithreán gréasáin pearsanta féin.

Tabhair faoi deara: ní bhreathnóidh na measúnóirí ach amháin ar naisc URL a chuireann tú ar fáil. Tá sé tábhachtach go ndéanfaidh tú cinnte go n-oibríonn gach nasc sa cháipéis **agus** go dtugann na naisc an breathnóir chuig an bhfoinse cheart ionas go mbeidh an breathnóir in ann rochtain a fháil ar d'ábhar tacaíochta agus breathnú air.

Ná marcáil d'ábhar mar ‘príobháideach’ mar nach mbeidh sé ar fáil lena mheasúnú. Athraigh na socruithe ar d'fhíseán go ‘neamhliostaithe’ más rud é nár mhaith leat go mbeadh an pobal in ann féachaint ar ábhar tacaíochta an iarratais ar do chainéal YouTube.

Comhaid a ainmniú go cuí

Maidir le gach comhad a bhfuil sé ar intinn agat é a uaslódáil, tabhair comhadainm air a léiríonn go soiléir cad atá ann nó cad a léirítear leis. Mar shampla ba cheart go mbeadh sé soiléir ó ainm an chomhaid cibé an CV, téacs samplach nó léirmheas ar shaothar roimhe seo atá sa cháipéis.

Cuir cáipéisí tacaíochta isteach i gcomhaid ar leith atá ainmnithe go cuí.

Ainmneacha	russelljack iarratas ar Thionscadal Ailtireachta.doc
maithle le	russelljack gearrthóg taibhithe.mp4
tabhairt ar	russelljack Tionscadal ailtireachta teimpléad buiséid babhta 2.xls
chomhaid i gcás	russelljack nasc youtube.doc
iarratasóra darb ainm Jack Russell	

Is é **40 MB** an t-uasmhéid iomlán maidir leis an ábhar tacaíochta ar fad a uaslódáiltear le hiarratas amháin.

Tabhair faoi deara: níl cead na carachtair seo a leanas a úsáid in ainm an chomhaid: " * : < > ? / \

2.4 Iarratas a dhéanamh ar líne

Chun d'iarratas a chur isteach ar líne, ní mór duit dul trí cheithre phríomhchéim. Cliceáil ar **Sábháil dréacht** ag deireadh gach céime. Is féidir leat teacht ar ais chuig d'iarratas agus é a athbhreithniú tráth ar bith sula gcuirfidh tú isteach ar deireadh é.

2.4.1 Roghnaigh clár maoinithe agus íoslódáil foirm iarratais

Chun tús a chur le hiarratas nua, cliceáil ar an gcnaipe **Déan iarratas** ar do leathanach baile, agus lean na leideanna chun an clár cuí maoinithe a roghnú agus chun uimhir uathúil thagartha a thabhairt do d'iarratas, trína n-aithneofar é. Ag an gcéim seo, is féidir leat an fhoirm iarratais a íoslódáil freisin (mura bhfuil sé sin déanta agat cheana féin).

2.4.2 Iarr méid an mhaoinithe

Ag an gcéim seo, sonraigh an caiteachas agus an t-ioncam a bhaineann le do thogra, agus méid an mhaoinithe atá á iarraidh agat. Ba cheart gurb ionann **an Méid atá á iarraidh** agus **Caiteachas iomlán** lúide **Ioncam iomlán**. Ba cheart go mbeadh na figiúirí deiridh a iontrálann tú anseo díreach cosúil leo siúd a iontrálann tú i gcuid 3 den fhoirm iarratais agus i do bhuiséad mionsonraithe.

2.4.3 Uaslódáil an fhoirm iarratais agus an t-ábhar tacaíochta

Lean na leideanna chun d'fhoirm iarratais atá comhlánaithe agat a uaslódáil, mar aon le buiséad mionsonraithe, CVanna agus aon ábhar tacaíochta riachtanach eile (féach ar chuid **1.7 Cén t-ábhar tacaíochta nach mór duit a chur isteach le d'iarratas?**). Ní gá duit gach rud a uaslódáil ag an am céanna. Is féidir leat d'iarratas a shábháil mar dhréacht, agus teacht ar ais chuige níos déanaí.

Tabhair faoi deara:: má tá d'fhoirm iarratais curtha i gcrích agat mar chomhad **.docx**, agus má tú muiníneach go bhfuil d'fhoirm iarratais líonta isteach i gceart (lena n-áirítear

clóscríobh laistigh de na réimsí liatha) ach go léiríonn na seirbhísí ar líne teachtaireacht a deir nach féidir an fhoirm a uaslódáil, déan iarracht í a shábháil mar chomhaid **.doc** agus í a uaslódáil arís.

2.4.4 Seol an t-iarratas

Nuair a bheidh tú sásta go bhfuil gach rud atá de dhíth chun tacú le d'iarratas uaslódáilte agat agus tic curtha leis an dearbhú agat, cliceáil **Cuir isteach**.

Ní féidir an t-iarratas a athrú tar éis é a chur isteach. Ná cuir an t-iarratas isteach go dtí go mbeidh tú iomlán sásta leis.

Ba cheart go bhfaighfeá dhá ríomhphost. Eiseofar an chéad cheann láithreach bonn nuair a gheobhaidh an Chomhairle Ealaíon d'iarratas. D'fhéadfá an dara ceann a fháil cúpla nóiméad ina dhiaidh sin agus d'uimhir iarratais ann, a úsáidfeá i ngach comhfhreagras a bhaineann leis an iarratas seo. **Tabhair faoi deara:** tá sé tábhachtach go rachfá i dteagmháil le onlineservices@artscouncil.ie mura bhfaigheann tú an dara ríomhphost deimhnithe ina mbeidh an uimhir iarratais.

3. Próiseáil agus measúnú na n-iarratas

3.1 Forbhreathnú

Déanann an Chomhairle Ealaíon gach iarratas a mheas, tugann sí breith orthu agus cuireann sí a breith in iúl do na hiarratasóirí de réir na nósanna imeachta atá leagtha síos. Is é an aidhm atá ann a chinntiú go bhfuil córas cothrom trédhearcach ann maidir le dámhachtainí a bhronnadh.

3.2 An próiseas measúnaithe

Déanann an Chomhairle Ealaíon gach iarratas a fhaightear a phróiseáil mar seo a leanas:

1	I ndiaidh d'iarratas a chur isteach, ba cheart go bhfaighfeá dhá ríomhphost: <ul style="list-style-type: none">Eiseofar an chéad cheann láithreach bonn, agus admhófar d'iarratas leis.Ba cheart go dtiocfadh an dara ceann cúpla nóiméad ina dhiaidh sin. Beidh d'uimhir iarratais ann, a mbainfimid úsáid aisti sa chomhfhreagras ar fad faoi d'iarratas. <p>Tabhair faoi deara: ní chiallaíonn na ríomhphoist seo ach go n-aithníonn an córas ar líne gur chuir tú iarratas isteach. Ní chiallaíonn siad go bhfuil d'iarratas incháilithe le haghaidh measúnú.</p> <p>Mura bhfaigheann tú ríomhphost ina mbeidh d'uimhir iarratais, téigh i dteagmháil le onlineservices@artscouncil.ie</p>
2	Seiceáiltear inghlacthacht an iarratais. Féach ar chuid 1.8 Incháilitheacht thuas.
3	Déanann comhairleoir(i) agus/nó an fhoireann measúnú scríofa ar an iarratas.
4	Molann comhairleoir(i) agus/nó an fhoireann ar cheart iarratas a chur ar an ngearrliosta nó nár cheart.
5	Déanann an painéal piaraí athbhreithniú ar na hiarratais go léir ar an ngearrliosta agus ar an ábhar gaolmhar, ansin tugann sé scóir agus déantar cinntí.
6	Déanann an Chomhairle nóta de na cinntí.
7	Cuirtear na cinntí in iúl do na hiarratasóirí i scríbhinn.

Achar ama

Déanann an Chomhairle Ealaíon dianiarracht iarratais a mheasúnú chomh luath agus is féidir ach mar gheall ar líon na n-iarratas agus ar an bpróiseas dianmheasúnaithe, tógfaidh sé suas le deich seachtaine ón spriocdháta go dtí go ndéanfar an cinneadh.

3.3 Critéir chun iarratais a mheasúnú

Déantar iarratais a mheasúnú i gcomhthéacs iomaíoch agus cuirtear an fhoirm iarratas agus na hábhair thacaíochta san áireamh. Déantar measúnú ar gach iarratas i gcoinne na gcritéir seo a leanas: **a)** fiúntas ealaíne, **b)** an chaoi a gcomhlíonann siad cuspóirí agus tosaíochtaí na scéime, agus **c)** indéantacht. Cuirtear síos ar gach ceann de na critéir sin thíos.

Cé go bhféadfadh iarratasóirí foirmeacha ealaíne/cleachtais ealaíon eile a roghnú mar chinn a bhaineann lena n-iarratas, déanfaidh an fhoireann atá freagrach as an bpríomhfhoirm ealaíne roghnaithe measúnú ar an iarratas agus d'fhéadfaidís siúd, i gcásanna áirithe, measúnú tánaisteach a iarraidh ó fhoireann eile.

Fiúntas ealaíne

I gcás an mheasúnaithe ar an bhfiúntas ealaíne, díritear ar chleachtas an iarratasóra roimhe sin agus ar nádúr na gníomhaíochta atá beartaithe, chomh maith le breithniú ar an méid seo a leanas:

- Caighdeán an smaoinimh agus na gníomhaíochta ealaíon atá beartaithe de réir mar atá léirithe san fhoirm iarratais agus sna hábhair thacaíochta a cuireadh isteach
- Cuntas teiste na foirne ealaíon a bhfuil baint acu leis an tionscadal de réir mar atá léirithe sa CV nó sna CVanna agus san ábhar tacaíochta eile a cuireadh isteach
- Cumas an iarratasóra/ealaíontóra damhsa a bheartaítear arna léiriú leis an bhfoirm iarratais agus leis na hábhair eile a cuireadh isteach
- Comhthéacs na foirme ealaíne nó an chleachtais ealaíon lena mbaineann an ghníomhaíocht atá beartaithe
- An uaimhian, an úrnuacht agus an inniúlacht atá léirithe ag an togra.

Cuspóirí agus tosaíochtaí na scéime a chomhlíonadh

Déantar iarratais a mheasúnú de réir a fheabhas a éiríonn leo cuspóirí agus tosaíochtaí na scéime a chomhlíonadh – féach ar chuid **1.1 Cuspóirí agus tosaíochtaí na scéime** le haghaidh sonraí ina leith.

Indéantacht agus luach ar airgead.

Bhreithneodh measúnú ar indéantacht agus luach ar airgead an cumas a léiríonn an t-iarratasóir chun an ghníomhaíocht bheartaithe a chomhlíonadh agus chomh mór is a chuireann sé le tionchar an mhaoinithe phoiblí. Áirítear air sin breathnú ar na nithe seo a leanas:

- An fhoireann a bhfuil baint acu leis an tionscadal a bhainistiú, a riar, agus a sholáthar
- A oiread a léiríonn an t-iarratasóir go bhfuil coinníollacha agus luach saothair cothrom á soláthar do na healaíontóirí rannpháirteacha
- Comhpháirtithe eile a bheith rannpháirteach sa tionscadal
- An buiséad atá beartaithe
- Foinsí eile ioncaim
- An clár ama nó an sceideal atá beartaithe.

3.4 Painéil phiaraí

Is é cuspóir chruinnithe an phainéil piaraí ná éagsúlacht tuairimí saineolacha a cheadú chun faisnéis a chur ar fáil don phróiseas cinnteoireachta. De ghnáth cuimsíonn painéil phiaraí triúr moltóirí seachtracha ar a laghad a bhfuil saineolas ábhartha acu ar an bhfoirm ealaíne agus/nó ar an gcleachtas ealaíon.

Bíonn comhalta de chuid na Comhairle Ealaíon i gceannas ar gach cruinniú de ghnáth agus gníomhaíonn an comhalta sin mar chathaoirleach gan ceart vótála. Freastalaíonn comhairleoirí agus foireann na Comhairle Ealaíon ar na cruinnithe de réir mar is gá, agus bíonn na daoine a raibh baint acu le measúnú tosaigh na n-iarratas ar fáil chun faisnéis a sholáthar, de réir mar is gá. Beidh rochtain ag lucht an phainéil ar gach iarratas ar an ngearrliosta agus ar an ábhar gaolmhar go léir lá roimh an gcruinniú, tráth a ndéanann siad na hiarratais ar an ngearrliosta a athbhreithniú, a phlé agus a scóráil. Ina dhiaidh sin, déantar iarratais a rangú de réir scóir. Mar thoradh ar an gcomhthéacs iomaíoch agus ar an mbuiséad ar fáil, is dóigh nach mbeidh an Chomhairle Ealaíon in ann a mhaoiniú ach líon beag de na hiarratais a gheofar.

Próiseas Scórála

Iarrtar ar an bpainéal na hiarratais a scóráil de réir an chórais seo a leanas:

- A – Caithfear a Mhaoiniú (10 bpointe): dar leis an gcomhalta painéil gur comhlíonadh na critéir go léir san iarratas le haghaidh na dámhachtana agus go bhfuil maoiniú tuillte aige ar an mbonn sin, an méid atá á iarraidh más féidir.
- B – Ba Chóir a Mhaoiniú (8 bpointe): dar leis an gcomhalta painéil gur comhlíonadh na critéir san iarratas an oiread sin go bhfuil maoiniú tuillte aige má tá acmhainní ar fáil.
- C – D'fhéadfaí a Mhaoiniú (5 phointe): dar leis an gcomhalta painéil gur comhlíonadh na critéir san iarratas, ach ní an oiread sin leis na hiarratais eile ó thaobh iomaíochta de.
- D – Ní Tosaíocht É (2 phointe): dar leis an gcomhalta painéil nár comhlíonadh na critéir san iarratas an oiread sin go bhfuil maoiniú tuillte aige.

Dearbhú leasa

D'fhonn cothroime agus cothromas sa chinnteoireacht a chinntiú, ní mór do chomhaltaí painéil leas a dhearbhu má tá dlúthcheangal pearsanta nó gairmiúil acu le hiarratasóir nó má tá baint acu ar shlí ar bith leis an iarratas. Féadann 'leas' a bheith ina 'leas airgid' nó ina 'leas neamhairgid' (e.g. gaol muintire, comhpháirtíochtaí pearsanta, nó comhpháirtíochtaí gnó idir fhoirmiúil agus neamhfhoirmiúil, etc.)

Ní mór an leas a dhearbhu a luaithe agus is eol don chomhalta painéil é a bheith ann. D'fhéadfadh sé sin tarlú ag an bpointe nuair a iarrtar air/uirthi suí ar an bpainéal (más eol an 'leas' ag an bpointe sin) nó tar éis liosta na n-iarratasóirí a fháil. I gcás go ndearbhaítear leas, ní bhfaighidh an comhalta painéil sin páipéir a bhaineann leis an iarratas sin agus beidh air nó uirthi an seomra a fhágáil nuair a bhíonn an t-iarratas ar leith á athbhreithniú. Nuair a thagann an cás sin aníos, vótálfaidh an Cathaoirleach in ionad an chomhalta painéil.

I roinnt cásanna, d'fhéadfadh sé nach n-aithneodh comhalta painéil go bhfuil coinbhleacht leasa ann go dtí go bhfaigheann agus go ndéanann sé/sí athbhreithniú ar na páipéir phainéil. I gcásanna den sórt sin ní mór don chomhalta painéil ball foirne den Chomhairle Ealaíon nó Cathaoirleach an phainéil a chur ar an eolas chomh luath agus a thuigeann siad go bhféadfadh coinbhleacht leasa a bheith i gceist.

Sa chás go gcuireann beirt ón bpainéal in iúl go bhfuil coinbhleacht leasa acu i leith aon iarratais amháin, beidh an cathaoirleach páirteach mar chuid den phróiseas cinnteoireachta i gcás an iarratais shonraigh sin.

Má tá coinbhleacht leasa ag Cathaoirleach ainmnithe an phainéil, ní mór dóibh é sin a dhearbhu a luaithe agus is eol dóibh go bhfuil a leithéid ann agus an fógra sin a thabhairt i scríbhinn roimh an gcrúinniú. Sa chás sin, beidh an Ceann Foirne mar chathaoirleach ar an bplé a dhéanfar maidir leis an iarratas a bhfuil coinbhleacht leasa i gceist leis.

3.5 Toradh na n-iarratas

Cuirtear gach iarratasóir ar an eolas i scríbhinn maidir le toradh a n-iarratas.

Cuirfear ríomhphost chugat mura gcuirtear d'iarratas ar ghearrliosta. Má chuirtear d'iarratas ar ghearrliosta, déanfaidh an coiste athbhreithniú air.

Má éiríonn le d'iarratas, cuirfear litir thairisceana chugat ina sonrúfar méid an mhaoinithe a bhronnfar ort agus téarmaí agus coinníollacha na dámhachtana. Inseofar duit freisin conas do dhámhachtain a tharraingt anuas.

Faigheann an Chomhairle Ealaíon líon mór iarratas, agus bíonn an t-éileamh ar mhaoiniú i gcónaí níos mó ná na hacmhainní a bhíonn ar fáil. Mura n-éireoidh le d'iarratas, is féidir leat

aiseolas a iarraidh ar fhoireann na Comhairle Ealaíon. Níl aon ghealltanas ann go mbronnfar dámhachtain mar gheall ar incháilitheacht agus ar chomhlíonadh nósanna imeachta iarratais amháin.

Níl iarratasóirí nach n-éireoidh leo incháilithe chun iarratas a dhéanamh ar dhámhachtain eile de chuid na Comhairle Ealaíon le tabhairt faoin ngníomhaíocht chéanna. Más dóigh leis an gComhairle Ealaíon go mbeadh an ghníomhaíocht atá beartaithe níos feiliúnaí do chlár dámhachtana eile is féidir eisceacht a dhéanamh. I gcás dá leithéid, cuirfear é sin in iúl duit i scríbhinn.

Achomhairc

Is féidir le hiarratasóirí cinneadh maoinithe a achomharc má mheasann siad gur sáraíodh nósanna imeachta foilsithe na Comhairle Ealaíon, nó gur cuireadh i bhfeidhm go héagórach iad nó nár cloíodh leo. Má mheasann tú nár cloíodh le nósanna imeachta na Comhairle Ealaíon, breathnaigh ar an bpróiseas achomharc ar <http://www.artscouncil.ie/ga/Maoiniu/Achomhairc/> nó téigh i dteagmháil leis an gComhairle Ealaíon le haghaidh cóip den bhileog faisnéise faoin bpróiseas achomharc.